

Man Caeuq Haeuxnaengj Hajsae

壮锦和五色糯米饭

□ Vangz Veijgingh Vangz Gveiciub

Doenghbaez, Mbanjcuengh miz boux yahmaiq ndeu heuhguh Dahbuh, ranz youq laj dinbya. De gig sinhoj dwk ganq sam daeglwg.

Seizneix sam daeglwg cungj majhung baenz vunz lo, ndaw ranz gij hong naek haenx cungj guh ndaej. Dahbuh ndaej ciensim guh gij hong daemj de simgyaez.

Dahbuh gaenx guh, swnz sienh youh coengmingz, sim lingz fwngz giuj. Gij man de daemj, bouboux yawj le cungj bak haenh mbouj dingz. De bi daengz byai daemj man cungj mbouj dingz gvaq, mbouj dan gyangngoenz daemj, caiqlix gyanghaemh hix daemj.

Seizhaenx, lij mboujcaengz miz dendwngh, gyanghaemh daemj man cijndaej diemj yeih, hoenz yeih oenq dwk da de foeg, raemxda lae mbouj dingz. Raemxda doek daengz gwnz man, bienqbaenz daengngoenz hoengzgywggwyg, bienqbaenz dujva hoengzfwdfwd, lij bienqbaenz va, nywj, gofaex, duzbya, duznong, duzroeg lumjlili. Daemj sam bi, dauqdaej daemj ok fuk man gyaeundeide ndeu lo.

Ngoenz he, Dahbuh dawz ok fuk man ngamq daemj baenz youq bakdou ranz ngonzyawj. Sawqmwh, mbwn laepnyamnyam, rumzraq bongifofo, ci deuz fuk man haenx lo. Fuk man haenx deng ci daengz dieg gyae-gyanggyang bae.

Gij doxgaiq aeu sam bi seizgan guh baenz, couh yienghneix siusaet. Dahbuh siengsim raixcaix. De gietdingh couhcinj aeu mingh bae vuenh hix itdingh yaek ra fuk man haenx dauqma. De baij Daegdaih caeuq Daengneih bae ra gonq, hoeng daengz haemhndaep, mbouj dan ra mbouj ndaej fuk man haenx dauqma, song daeglwg de bae ra fuk man haenx hix mbouj raen dauq.

Yienghneix, de youh baij daeglwg iq de Daegcaiz bae ra song daeglwg caeuq fuk man haenx.

Daegcaiz mbouj lau hoj, mbouj lau baeg, bin bya gvaq dah, daeuj daengz gwnz Byadaengngoenz, yawj-raen aen ranz ronghmyanmyan ndeu.

Ndaw ranz cienz ok baenz raq sing go caeuq sing riu. Daegcaiz byaij daengz bakdou baez yawj, raen fuk man daxmeh de daemj haenx cingq venj youq gwnz ciengz, gyoengq dahsien baenz baiz naengh youq naj fuk man haenx, doq ciuq fuk man haenx daemj doq ciengq go.

Gyoengq dahsien raen Daegcaiz, roxnyinh gig geizheih, cam de miz maz saeh. Daegcaiz gangmingz de vihmaz daeuj, gyoengq dahsien gig simhoengz dwk dakdaih de, louz de ninz haemh ndeu.

Haemhhaenx, dahsien lienz-haemh ciuq dwk daemj man. Miz boux

dahsien daenj buh hoengz ndeu daemj sat gonq, ciepdwk couh laeglemx siuq gij siengq bonjfaenh daengz gwnz man Dahbuh bae.

Ngoenz daihngneih, gyoengq dahsien boizhawj Daegcaiz fuk man haenx, hawj Daegcaiz dawz dauqbae.

Liggaueq sam nyied cosam, Daegcaiz dauq daengz ranz, de baez haeuj ranz, couh sing hung naeuz: “Daxmeh, gou dawz fuk man mwngz daemj haenx dauqma lo.”

Dahbuh vuenheij dangqmaz, ganjgip ciepdwk aeu fuk man haenx, youh siusim sisi mbehai.

Sawqmwh, rumz cififi, fukman deng ci hai mbeok, hungloetloet, beij gaxgonq lai hung geij boix. Ciepdwk, rongh gim baez myig, aen ranz Dahbuh bienqbaenz ranz moq youh sang youh hung youh rongh. Seiqhenz ranz va moq angj hai, miz boux dahsau lengj he ndwn youq ndaw cazva.

Dahbuh byaij gvaqbae cam: “Mwngz dwg bouxlawz? Vihmaz daeuj daengz gizneix?” Boux dahsau haenx naeuz: “Gou dwg boux dahsien. Aenvih gou siuq gij siengq gou youq gwnz fuk man mwngz daemj, couh deng dawz daengz gizneix. Gou baez raen Daegcaiz couh simgyaez de lo, gou nyienh caeuq de guh gvanbaz.”

Dahbuh dingq le angqvauvau, ganjgip cingj de haeuj ranz bae

naengh. Haemhhaenx, couh hawj de caeuq Daegcaiz doxaeu.

Aen siusik Dahbuh aeu ndaej dahsien guh bawx cienz doh mbanj, gyoengq beixnuengx faenfaen daeuj angqhoh. Dahsien couh guh haeuj-naengj hajsae daeuj dakdaih daihgya. Ndawde, haj saek, dwg maqmuengh gij ndwenngoenz daengzcog couh lumj seizcin yienghhaenx hoengzhoengz henjhenj; aenvih haeuxcid niu, giet baenz ndaek le mbouj yungzheih sanq, de yienjok dahsien caeuq vunz lajbiengz gaenjmaed doxgiet, ciengxlwenx mbouj doxbiek.

Caegya gwn haeuxnaengj hajsae le, roxnyinh cungj ngaiz neix gig daegbied, gig ndei gwn, feihdauh youh hom, couh cam dahsien haeuxnaengj hajsae baenzlawz guh. Dahsien mbouj muenz saek di, ciengzsaec dwk gangj hawj daihgya dingq. Daihgya dingq le, cungj geiq maenh gij guhfap haeuxnaengj hajsae, doxdauq lij gangj hawj bouxwnq dingq.

Gvaqlaeng, moix bi baez daengz sam nyied cosam, couhdwg ngoenz dahsien caeuq Daegcaiz doxaeu caemhcaiq son vunz lai guh haeuxnaengj hajsae, vunz Bouxcuengh cungj guh haeuxnaengj hajsae daeuj gwn.

(Vangz Gyanghmyauz hoiz)

Aen Mbanj Neix Vihmaz Heuhguh Daemzmax

这个屯为什么叫塘马

□ Vangz Gozgvanh / 黄国观

Youq Bingzgoj Yen Seiqdaemz Cin Yinsanh Cunh miz aen mbanj swhyienz he heuhguh Daemzmax. Gangj daengz vihmaz heuhguh Daemzmax ne, ndaw mbanj neix miz bouxlaux he caeuq gou gangj: “Baenzneix heuh miz gaengawq bw! Aen mbanj baihnaj miz dieg gumh he, gingciengz miz raemx comz haeujbae. Cojcoeng dou roxnyinh aen dieg neix gig ndei, couh lumj aen ruh sam duz max doengz ndoet raemx nei. Gvaqlaeng, gyoengqvunz couh vat gizneix baenz aen daemz ndeu.” De vix aen dingbya doiqnaj Mbanjdaemzmax 8 bak mij gyae he yienghneix cam gou: “Mwngz yawj goengq bya neix lumj mbouj lumj duz max ndeu?” Gou ngiengxgyaeuj baez yawj, caen miz di lumj duzmax bw. De youh yinx aen baihlaeng mbanj baihsuix caeuq baihgvas naeuz: “Song baih neix cungj miz song goengq bya, cungj dwg cungqgyang gumh roengzbae, lumj song aen anmax.” Ndigah aen mbanj neix couh heuhguh Daemzmax. Aen coh mbanj neix couhdwg gaengawq gij deihsieq daeuj heuh. Doeklaeng, miz boux deihleix sienseng he daeuj daengz mbanj neix baez yawj, nyinhnaeuz baihsuix goengq bya baihlaeng aen mbanj caeuq baihgvas wnggai yawj baenz duz max ndeu, aen dieg neix dwg haj duz max doengz ndoet aen ruh cij deng. Mboujguenj dwg sam duz max roxnaeuz haj duz max, aen coh mbanj neix cungj dwg caeuq daemz caeuq max mizgven.



Singzgeq Denzcouh Bwzswz.

Cinz Veifunghingj



Miz aen suj hung he daep gwnz bakdou, diuz ganjdiet co he baenzlawz yunghrengz bae hai, hai buenq ngoenz hix hai mbouj ok. Seizneix, fag yaekseiz ndeu daeuj lo, cij raen de nonx haeuj congj suj bae. Yienznaeuz

ndang de gig byom, hoeng, nyed yaep ndeu, aen suj hung haenx couh deng hai ok lo.

Diuz ganjdiet gig geizgvaiq, couh cam fag yaekseiz neix: “Vihmaz gou baenzneix yunghrengz hix hai mbouj ok, hoeng mwngz gig yungzheih couh guh daengz ne?”

Fag yaekseiz neix gangj: “Yienznaeuz mwngz beij gou lij co haujai, hoeng miz saek di, gou beij mwngz rox aensim aen suj haenx. Miz saek seiz, guh saeh baenzgoeng mbouj dwg cij baengh byawz rengz hung byawz rengz iq.”

Aen sim moix boux vunz, cungj lumj aen bakdou aeu suj gaengq daep hwnj, diuz ganjdiet caiq co hix hai mbouj ok. Cij miz rox ndawsim bouxwnq siengj maz, bienqbaenz fag yaekseiz he saeqsim, cij ndaej byaij haeuj ndawsim bouxwnq bae.